

藝文下

序銘跋

示啟說

詩雜記

平遙州續志

第六冊

鳳西書院膏火賓興序

張鈞

利在一人與利在人人其廣狹何如也利在一世
與利在世世其久暫又何如也一人爲人人之利
一人爲世世之利且合眾人之利而爲一事之利
合眾人之利而爲數事之利並合數事之利而適
成爲一事之利其廣可知其久更可知矣美哉洋
洋乎吾平書院之事之盛已自

國朝康熙三年平水西改土歸流學始立焉其時披
荆斬棘諸凡草創良有司方盡心於溝洫訟獄之

不暇而禮教之地尙畧而未詳也夫十步之澤必有芳草數十年沐浴

聖化而赴瓊林入詞垣者亦頗有其人矧其爲名師友之所化導賢司牧之所獎勵者哉乾隆初霖邨刺史始創爲平陽書院延名師以明其道捐膏火以勵其材祀宋周程張楊游羅李朱九賢焉所以然者書院育材地講聖賢之學宜學聖賢之學也胡敬齋之言曰科舉之學壞人材非科舉之壞也第知科舉之學之壞也三代而下昌黎韓子濂溪周

子二程伯子叔子紫陽朱子其進身皆由於科目
而或登於堂或入其室要皆以聖賢之學副科目
之選者也霖邨其亦得此意乎自是厥後捐俸勸
輸置田爲膏火計者則有若柳州刺史設條約立
課程更平陽書院曰鳳西課士之功較昔加倍則
有若宿航刺史蓋刺史以名進士蒞吾平其曲成
之心切故其措置較多亦幾幾乎盛矣然而猶未
極其盛也道光丙午石民刺史憫書院之荒蕪勸
輸一萬餘金葺而新之置穀四百餘石以課士又

平遠縣志 卷之八
修志乘設試資凡昔之所未有者而悉備焉厥功
懋哉學者誠能體霖邨先生崇祀周程諸賢之意
石民先生培養人材之心而矢志匪懈則處爲名
儒爲聖賢衛道之任出爲良吏爲

國家有用之才固不獨弋科名登仕版爲宗族鄉黨
榮也夫立志聖賢者讀書之實功也振興人文者
操治之切務也莫爲之前雖美弗彰莫爲之後雖
盛弗繼前如鐵梅刺史之賓興卷田親供冊本後
如竹樓刺史之義學公車田出貢資皆足與書院

試資數端同臻美備並傳於不朽故其捐輸條規
附載於末俾後之覽者觀感興起知非一人一世
之功也豈徒曰小補云爾哉

傅公碑序

傅 桐

公印作霖號雨田蜀之璧山縣人剛直寡欲勇於
爲善同治十年辛未四月署平遠州吏目事俗好
聽訟原告往往得直顛倒是非善良苦之公以理
訟非職一洗從前陋習導之以善刁風息而民賴
以安城中舊設義學以經費支絀教難其人公捐

置良田谷租二十大石以資修脯又倡刻小學一書以正蒙養咸謂堂上禹門公多善政尤重育才堂下能踵而增之亦屬員中之矯矯者也使久於佐治地方當更有裨益惜甫期年遂解組去邑人感之爰紀其事以垂不朽云

節孝安孺人趙氏壽序

譔煥模

天地有正氣日星河嶽所以昭垂萬古而歷劫不朽者此也人得之爲忠臣爲孝子爲義士而其鍾於婦人女子者則莫如節我

國家風化惟休淮旌節孝人或謂節必兼以孝而孝乃全不知節能勝以義而節彌光易曰節亨苦節不可貞節固未有不苦者然第以淒涼寂寞爲苦矢志靡他爲義而非艱難備受險阻親嘗卒能爲人所不能爲任人所不能任保全於覆巢之下者猶未見其節之非易易而所關者尤大也如安母趙孺人之苦節也可謂能勝以義非獨尋常節孝之謂也孺人生長京邑習見繁華未常知鄉愚之窮也未常睹跋涉之艱也其來歸安君也年僅十六坐

擁倉箱更未知操作之勞也更未識饑寒之迫也
無何情虛玉府蟾圓未屆九秋夢冷青閨鵲寡方
零廿歲斯亦已矣而乃茫茫劫運迭起烽烟累累
人家頻轉溝壑一炬焦土萬井蓬蒿饑饉連年豺
狼滿地當是時也母也青年子也黃髮流離瑣尾
偃偃何之所謂孤苦零丁相倚爲命雖以丈夫當
之爲力豈易而不圖孺人之處常既有度處變復
有方卒能轉禍爲福以有今日也憶當日者以世
變之迭出也虎狼外噬猶可逃也鷹鷂內逼不可

測也避而遠之不激不隨蓋於重圍高壘之外獨
擇斗大之平城越信宿而移居者十有餘年而患
胥消於無形其識微見遠之故不智而能若是乎
以田園之荒廢也籌牛種廣招徠時廛補助克勤
克儉外不吝而內不奢蓋於數百里相距之遙聯
絡人心以資墾種而已無不給人無不洽謂不仁
而能之乎且以教子之有方也雖在逃亡不廢詩
書雖處窮乏不惜經費爲之延師課讀不以家計
累其身不以逸居損其志安生亦能體母志奮勉

雲程果於辛巳歲試補弟子員義方之訓貽謀之
遠謂非賢而有才者能爲之乎厥後幸屆時清復
我邦土經營家政百廢具興迄今榮華日上氣象
蒸蒸前之一片瓦礫者依然鳥革翬飛矣前之四
野荒蕪者依然繡壤雲屯矣前之室如懸磬者依
然櫓比壙崇矣蓋濟時艱於罔替復先業於就湮
卒使危而復安家聲克振是其節之保全者承先
啟後大義彌昭而非獨尋常苦節之謂也且夫豐
亨者淫佚所由習也困苦者堅貞所由渝也至於造

次顛沛鮮有不束手無策而一蹶難振者也若夫
富貴不能淫貧賤不能移威武不能屈此孟子所
謂大丈夫者求之鬚眉且難其人何況巾幗茲猶
人似之殆所謂巾幗而鬚眉者耶夫由前言之節
則未有不苦者由後言之節尤未有不亨者安氏
水西氏族代爲

國家守土捍禦之功累書竹帛可謂忠矣積功累行可
謂孝矣今孺人又以節義繼之昌大何極安生勉
乎哉異日者易繫觀光疊晉恩榮之誥詩歌壽母

重興倉聖祠
從遊有年悉其家世爰樂爲纂紀其畧載之簡編
以垂不朽是爲序

重興倉聖祠惜字會序

黃紹先

上古結繩而治自倉聖有書契之作而後萬世啟
文明然賴之者愈多卽褻之者愈眾或壅塞窗竇
或投溷污泥固不僅祖龍一炬爲文字厄也余嘗
心焉悼之前需次省垣時曾捐廉倡爲文昌惜字
會並得同寅資助獲金若干因交商生息議定規

條事甫竣余卽奉憲檄飭赴本任暇日與州人士
相接詢及惜字之舉僉云平陽向有舊會因兵燹
以來此事遂廢蓋公款之虛糜久矣今年春季二
十七日爲 倉聖會余拈香至祠適王應祖謹創
模朱紹陽謹金壽諸君等在座談論閒商及惜字
舊會欲卽此地而振興之諸君咸稱善爰請序於
予願廣爲勸捐以襄厥成予因慨夫世之人自束
髮受書於先聖所造之字每棄如弁髦而於修神
殿塑佛堂往往極土木之巧侈金碧之觀倡之者

一和之者累百盈千甚至蕩中人之產而不惜大
抵惑於二氏果報之說冀邀福於冥漠耳夫以施
求報儒者不爲而作善降祥

天道實有自然之理厯觀當世記傳所載其由惜字而
子孫致身青雲者指不勝屈亦誰謂

彼蒼之有負善人耶予因捐廉囑王應祖諸君董其事
所願州之人集腋成裘襄成善舉庶篆草隸真以
及僦休僦倚之製佉臺靈寶之章其委諸溝中者
雖隻字片書拾之不管珍同拱璧吾知 倉聖有

靈較二氏之默佑更捷如桴鼓而此邦人文蔚起
其登虎榜而入鳳池者必更甚於今日矣是則余
之所厚望也夫

丁文誠公墓志銘

閻敬銘

同治七年春捻匪張總愚擁逆數萬自晉而豫漸
犯畿疆北蹂定州歟及保定勢且燎原去 禁輦

僅二百里 朝廷震動至遣宿衛之旅出 國門

備寇當是時有越境聞警炳燭會軍僚號所部騎
伍兼郵入援一日夜數百里猝出賊前轉戰雄任

深祁高肅之交復饒陽城倥偬之際其他將帥多得詰讓而一軍北上首先奮勇勇往迅速保衛近畿之襄不絕於驛詔凡七下聲赫中外則山東巡撫丁公也八年秋有樓船銜尾自潞津來沂運河南下旗繒殊異侶倂都甚力人健師歌兒浮屠詭處其間奪觀駭聞嘶呼佚揚所經爲之下無敢發者蓋安得海以太監稱有密遣而山東巡撫執而鞫之謂大臣未聞有命汝曹私出制令所無必詐無疑奏言置於法亦丁公也公諱寶楨字穉璜